

La Scola bilingua vegn optimada

La Scola da la citad da Cuir reagescha sin la critica da geniturs rumantschs

MARTIN CABALZAR/FMR

■ **Dapi 20 onns maina la citad da Cuir er ina scola bilingua rumantsch-tudestg. Tut en tut è questa instituziun sa cumprovada bain. Sin giavisch dals geniturs èn tuttina prevesidas intgins meglieraments a partir da l'onn da scola 2021/2022.** La partiziun tudestg-rumantscha da la Scola bilingua è integrada en la chasa da scola Lachen che maina actualmain 17 classas dal stgalim primar. Tschintg da quellas classas vegnan mandadas sco scola bilingua cun tudestg e rumantsch sco lingua d'instrucziun. Sin fundament da las annunzias inoltradas è previs d'instruir l'onn da scola proxim tut ils 18 scolars da l'emprima classa ed ils 12 scolars da la sisavla classa mintgamai en gruppas d'annada. Ils scolars da la segunda fin 5avla classa vegnan reunids en trais gruppas da duas classas cun mintgamai 20, 17 e 15 scolars. Tut en tut vegnan pia 82 scolars a frequentar l'onn da scola 2021/22 la partiziun bilingua tudestg-rumantsch. Tar la scola da Lachen tutgan plinavant er tschintg partiziuns da scolina. Actualmain frequentan 392 scolares e scolars la scola Lachen ed els vegnan furmads da total 45 persunas d'instrucziun. Plinavant stattan er a disposiziun canortas dal di ed in post per lavur sociala e da giuventetgna, di il manader da scola *Armando Carboni*.

La scola bilingua tudestg-talian vegn menada cun mintgamai duas partiziuns per annada en la chasa da scola Rheinau, la scola bilingua tudestg-rumantsch cun mintgamai ina mesa classa en la chasa da scola Lachen. Igl acquist da lingua succeda a moda immersiva, mintgamai la mesadad succeda per tudestg-rumantsch, resp. per tudestg-talian. Il manader da la scola Lachen Armando Carboni è conscient che mintga model ha avantatgs e dischavantatgs e che quest model pretend tant da geniturs sco da la magistraglia gronda flexibilitad.

Analisa la situaziun e scleri ils basegns

Sco quai ch'il schef da stab da las scolas da Cuir *Fabio Cantoni* ha tradi a la FMR chaschuna la structura e la furmaziun da las classas adina puspè dumondas e malsegirtads. Perquai hajan ils respunsabels lantschè il december passà ina retschertga tar las famiglias directa-



La partiziun tudestg-rumantschas da la Scola bilingua da Cuir vegnan mandadas en la chasa da scola Lachen – en il quartier da Lacuna.

FOTO DAVID TRUTTMANN

main involvidas. Returnads sajan vegnids 53 questunariss. Per 36 scolars è il rumantsch la lingua discurreda en famiglia, per 17 n'è quai betg il rumantsch. 20 geniturs èn da l'avis che lur uffant fetschia buns progress en la lingua rumantscha, 24 detg buns, 8 pitschens ed 1 insumma nagins progress.

Conclusiuns da la retschertga

Ina terza da quels che han respundi refusan expressivamain partiziuns che sa cumponan da trais differentas annadas e pretendan da manar partiziuns mo d'ina u duas annadas. Quai vegn parzialmain er motivà cun ils disturbis che midadas frequentas da stanzas da scola chaschunan. Plinavant insista la maioriad dals geniturs sin la pretensiun che l'immersiun duai esser dapertut eguala e che la cumpart rumantscha duai muntar a minimal la mesadad dal temp d'instrucziun. Plirs geniturs han accentuà la necessitad da pretender che scolares e scolars respundian durant scola per rumantsch. Per rinforzar la posiziun dal rumantsch stoppian ins dentant er persequitar la pussaivladad da cuntinuar cun la purschida rumantscha sin il stgalim superiu. Singuls geniturs vulan recepì en la classa bilingua mo scolars che disponan gia da bunas enconuschientschas dal rumantsch. Plinavant vegn er insinuà da manar classas pli pitschnas per avair dapli resursas persunalas per l'instrucziun individuala e da chantar dapli chanzuns rumantschas e talianas empè da englaisas.

Per garantir in tractament egal a las scolares ed als scolars duai vegnir renunzià a partiziuns che cumpiglian trais annadas. Bunas notas survegnan dentant classas cumbinadas da duas annadas che hajan in effect positiv sin la qualitad da l'instrucziun e promovian er il contact social tranter ils scolars. Mo singuls geniturs pretendan explicitamain classas d'annada.

Tenor la directura da las scolas da Cuir *Ursina Patt*, saja l'intenziun da furmar en l'avegnir partiziuns che consistan da duas annadas. Sin fundament dal svilup dal dumber da scolars sajan dentant er partiziuns d'ina classa pussaivlas. Da respectar sajan natiralmain la limita da grondezza minimala da las classas stipulada en la lescha chantunala, di la directura concludend.